

十文給還本主一在前累年未及庫虧欠之物辛丑年以前勿令並徵從之○乙卯禮曹與政府六曹同議啓王世子於師傳致賻雖無古典請賻二十石從之○丙辰大風東北方有赤氣○受朝視事輪對○兀狄哈千戶豆稱哈等三人來獻土宜賜衣服笠靴回賜綿布有差○日本國愁溫都老藤原賴久源朝臣貴久等使人來獻硫黃丹木白磻珠鐮刀槍皮張等物回賜正布二百四十匹○傳旨大小朝會拜時先跪左膝興時先起右膝載在儀軌文武群臣皆不能遵用此法令憲府考察通禮門知會○川寧縣令鄭抱辭上引見曰守令之職其目雖多然其大要不過愛民而已近因水旱農事不實民多艱食予甚憂之擇選守令親見以送大抵百姓安居則可以備衣食免飢寒如不得已國家所需貢賦則不能盡免其他徭役在汝用心如何往哉乃邑懋哉懋哉○命還給尹仁甫職牒○禮曹啓兀良哈也吾乃幹朶里弓乙主女真甫乙古等二十八人求請喪用紙指揮四人請給三十卷其餘千戶二十四人給二十卷從之○命給侍衛受職幹朶里阿充可仇音甫下兀狄哈末之應哈等紗帽角帶○禮曹啓舊例倭客人上副官人船主押物一時供給白米一升五合黃豆二升伴從人白米一升豆一升五